



華陽國志卷第十一

後賢志

聞之善志者述而不作序事者實而不華是以史遷之記詳於秦漢班生之書備乎哀平皆以世及事邇可得而言也西州自奉聖晉後俊瑋倜儻之士或脩德讓行止從時或播功立事羽儀上京策勳王府甄名史錄侔於先賢會遇喪亂軋華夏顛墜典籍多缺族祖武平府君愍其若斯乃操簡援翰拾其遺闕然但言三蜀巴漢未列又務在舉善不必矜異揆之耆舊竹素宜闡今更撰次損益足銘後觀凡二十人



綴之斯篇雖行故墜沒大較舉其一隅

衛尉散騎常侍文立廣休

散騎穆穆誠感聖君

西河太守柳隱休然

西河烈烈秉義居真

漢嘉太守司馬勝之興先

漢嘉克讓謙德之倫

郫令州主簿常勗脩業

郫君蹇諤自固底身

江陽太守何隨季業

江陽皎皎命世清淳

梓潼太守王化伯遠

梓潼矜矜在險能平

太子中庶子陳壽承祚

庶子稽古遷固並聲

漢中太守李宓令伯

漢中躡躡才蓋羣生

犍爲太守杜軫超宗

犍爲印印友于寔令

給事中任熙伯遠

給事溫恭尚德茂榮

中書郎王長文德雋

中書淵識寶道韜明

大長秋壽良文淑

長秋忠肅明允篤誠

大司農西城公何攀惠興

司農運籌思侔良平

少府成都威侯李毅允剛

少府果壯文武是經

衡陽內史楊邠岐之

衡陽固節隱然不傾

尚書三州都費立建熙

尚書準繩古之遺直

湘東太守常騫季慎

湘東汜愛仁以接物

武平太守常寬泰恭

武平壘壘冰清玉嶷

揚烈將軍梓潼內史譙登慎明

江陽太守侯馥世明

文立字廣休巴郡臨江人也少遊蜀太學治毛詩三禮兼通群書州刺史費禕命為從事入為尚書即復辟禕太將軍東曹掾稍遷尚書蜀并于魏梁州建首為別駕從事咸熙元年舉秀才除郎中晉武帝方欲懷納梁益引致隽彥泰始二年拜立濟陰太守武帝立太子以司徒李胤為太傅齊王驃騎為少傅選立為中庶子立上疏曰伏惟皇太子春秋美茂盛德日新始建幼志誕陟大繇猶朝日初暉良寶耀璞侍從之臣宜簡俊又妙選賢彥使視觀則覩禮容棣棣之

則聽納當受嘉話駭耳之言靜應道軌動有所采佐清初陽緝熙天光其任至重聖王詳擇誠非糞朽能可堪任臣聞之人臣之道量力受命其所不諧得以誠聞帝報曰古人稱與田蘇遊非舊德乎立上故蜀大官及盡忠死事者子孫雖仕郡國或有不才同之齊民為劇又上諸葛亮蔣琬費禕等子孫流徙中畿宜見叙用一則以慰巴蜀民之心其次傾東吳士人之望事皆施行十年詔曰太子中庶子立忠貞清實有思理器幹前在濟陰政事修明後事東宮盡輔導之節昔光武平隴蜀皆收其才秀所以援濟殊方伸

敘幽滯也其以立為散騎常侍累辭不許上疏曰臣
子之心願從疏以求昵凡在人情貪從幽以致明斯
實物性賢愚所同臣者何人能無此懷誠自審量邊
荒遺燼犬馬老甚非左右機納之器臣雖至愚處之
何顏詔曰帝伯之職簡才而授何謙虛也立自內侍
獻可替否多所補納甄致二州人士銓衡平當為士
彥所宗故蜀尚書掾為程瓊雅有德望素與立至厚
武帝聞其名以問立立對曰臣至知其人但年垂八
十稟性謙退無復當時之望不以上聞耳瓊聞之曰
廣休可謂不黨矣故吾善夫人也西界獻馬帝問立

馬何如對曰乞問太僕帝每善其恭慎遷衛尉猶兼
都職中朝服其賢雅為時名卿連上表年老乞求解
簪還桑梓帝不聽咸寧末卒帝緣立有懷舊性乃送
葬于蜀使者護喪事郡縣修墳塋當時榮之初安樂
思世子早沒次子宜嗣而思公立所愛者立亟諫之
不納及愛子立驕暴二州人士皆欲表廢立止之曰
彼自暴其一門不及百姓當以先公故得爾也後安
樂公淫亂無道何攀與上庸太守王崇涪陵太守張
寅為書諫責稱當思立言凡立章奏集為十篇詩賦
論頌亦數十篇同郡毛楚楊崇皆有美德楚牂柯守

崇武陵太守

柳隱字休然蜀郡成都人也少與同郡杜植柳伸並知名隱直誠篤亮交友居厚達於從政數從大將軍姜維征伐臨事設計當敵陷陣勇畧冠軍為牙門將巴郡太守騎都尉遷漢中黃金圍督景耀六年魏鎮西將軍鍾會伐蜀入漢川圍戍多下惟隱堅壁不動會別將攻之不能克後主既降以手令勅隱乃詣會晉文帝聞而義之咸熙元年內移河東拜議郎武帝踐祚以為西河太守在官三年以年老去官乞骸還蜀卒於家時年八十長子充連道令次子初舉秀才

杜禎字文然柳伸字雅厚州牧諸葛亮辟為從事禎符節令梁益二州都督伸度支禎子珍字伯重略陽護軍仲漢嘉巴東太守大同後並舉秀才珍子彌字景文伸子純字偉淑有名德幹器舉秀才巴郡宜都建平太守西夷長水校尉巴東監軍

司馬勝之字興先廣漢綿竹人也學通毛詩治三禮清尚虛素性澹不榮利初為郡功曹甚善綱紀之體州辟從事進尚書左選郎徙秘書郎時蜀國州書佐望與郡功曹參選而從事侔臺郎時重察舉雖位經朝要還為秀孝亦為郡端右景耀末郡請察孝廉

大同後梁州辟別駕從事舉秀才歷廣都新繁令政
理尤異以清秀徵為散騎侍郎以宗室禮之終以疾
辭去職即家拜漢嘉太守候迎盈門固讓不之官閑
居清靜謙卑自牧常言世人不務求道德而汲汲於
爵祿若吾者可少以為有餘榮矣訓化鄉閭以恭敬
為先年六十五卒於家子尊賢佐皆有令德

常勗字脩業蜀郡江原人也祖父員牂柯永昌太守
父高廟令從父閔漢中廣漢太守勗少與閔子忌齊
名安貧樂道志篤墳典治毛詩尚書涉治群籍多所
通覽州命辟從事入為光祿郎中主事入為尚書左

選郎郡請迎為功曹時州將董軍政置從事職典刑
獄以勗清亮復為督軍治訟平當還察孝廉除郫令
為政簡而不煩魏征西將軍鄧艾伐蜀破諸葛瞻於
綿竹威振西土諸縣長吏或望風降下或委官奔走
勗獨率吏民固城拒守後主檄令乃詣艾故郫穀帛
全完刺史袁邵嘉勗志節辟為主簿勗善儀容翔集
動為表觀言論壯烈州里重之然交友惟賢不交下
已者汎愛之恩猶不足邵征還道卒 忌字茂通蜀
謁者黃門侍郎喪親以致孝聞察孝廉為郎使吳稱
職歷長水參軍什邡雒令大同後刺史邵坐治城被

征忌詣洛陳訴遠國初附君民始結不宜改易又表
脩治城池居安思危邊將常職事皆中情晉文帝時
為相國辟忌舍人武帝踐祚拜騎都尉除河內令州
名為難治忌挫折豪勢風教大行縣有姦嫂殺兄者
群黨蔽匿前令莫得忌皆窮治入為州都方議為郡
守會卒忌為人信道任數不從下人故為貴勢所不
善是以作詩著論先攻已短臨喪與樂歡哀俱至為
士類所稱忌友人廣漢段宗仲亦有學行蜀時官與
忌比袁邵為主簿與忌共理郡事文帝善之梁州辟
別駕從事舉秀才稍遷官至雲南建寧太守

何隨字季業蜀郡郫人也漢司空武後世有名德徵
聘入官隨治韓詩歐陽尚書研精文緯通星曆郡命
功曹州辟從事光祿郎中主事除安漢令蜀亡去官
時巴土饑荒所在無穀送吏行之輒取道側民芋隨
以綿繫其處使是所取直民視芋見綿相語曰聞何
安漢清廉行過從者無糧必能爾耳持綿追還之終
不受因為語曰安漢吏取糧令為之償察孝廉大同
後臺召不詣除河間王郎中令不就居貧固儉衣弊
蔬食晝躬耕耨夕脩講諷鄉族饋及禮厚皆不納目
不視色口不語利著譚言十篇論道德仁讓常有屠

牽猪過隨門猪索斷失之強認溷中猪隨便牽猪與之屠人出門尋得其所亡猪謝隨還猪遂以包之有家養竹園人盜其笋隨遇行見之恐盜者覺怖走竹中傷其手足挈屐徐步而歸其仁如此太康中即家拜江陽太守民思其政年七十一卒官後州鄉人言議平當者皆相謂何江陽至于汶山夷有正直廉讓者亦號夷中何江陽杜景文何興仁皆為作傳長子觀字巨忠清公淑慎知名州里察孝廉西都南安令平西長史張昌作亂荊州從黨西上郡守無不望風降下至江陽平西將軍羅尚表為安遠護軍討賊

平殄除巴郡太守朝議欲以為寧州刺史會病卒次子遊治中從事隨時同郡繁令張崇清廉推讓見稱當時

王化字伯遠廣漢郫人也漢將作大匠王堂後也祖父商字文表州牧劉璋時為蜀太守有懿德高名在耆舊傳父彭字仲巴郡太守化兄弟四人少有令望化治毛詩三禮春秋公羊傳郡命功曹州辟從事光祿郎中主事尚書郎除閬中令為政清靜察孝廉大同後復端右郡察孝廉為樂涇令按晉書樂涇縣名屬酒泉郡縣近邊塞值胡虜反化率吏民積穀堅守虜斷道重

圍孤絕七年伺虜怠惰出軍討之民得野掠大軍至虜退以功封關內侯遷朱提太守撫和殊俗得夷肆懽心轉在梓潼復有稱績為人謹重言論方雅減否允棗州里服其誠亮年七十二卒官弟振字仲遠亦有德望廣都令巴東太守叔弟岱字季遠恪居官次歷廣陽作唐令早亡少弟崇字幼遠學業淵博雅性洪粹蜀時東觀郎大同後梁州辟別駕別舉秀才尚書郎與壽良李宓陳壽李驤杜烈同入京洛為二州標隽五子情好未必能終惟崇獨以寬和無所彼此著蜀書及詩賦之屬數十篇其書與陳壽頗不同官

至上庸蜀郡太守

陳壽字承祚巴西安漢人也少受學於散騎常侍譙周治尚書三傳銳精史漢聰警敏識屬文富豔初應州命衛將軍主簿東觀秘書郎散騎黃門侍郎大同後察孝廉為本郡中正益部自建武後蜀郡鄭伯邑太尉趙彥信及漢中陳申伯祝元靈廣漢王文表皆以博學洽聞作巴蜀耆舊傳壽以為不足經遠乃并巴漢撰為益部耆舊傳十篇散騎常侍文立表呈其傳武帝善之再為著作郎吳平後壽乃鳩合三國史著魏吳蜀三書六十五篇號三國志又著古國志五

十篇品藻典雅中書監荀勗令張華深愛之以班固
史遷不足方也出為平陽侯相華又表令次定諸葛
亮故事集為二十四篇時壽良亦集故頗不同復入
為著作鎮南將軍杜預表為散騎侍郎詔曰作適用
蜀人壽良具員且可以為侍御史上官司論七篇依
據典故議所因革又上釋諱廣國論華表令兼中書
郎而壽魏志有失勗意勗不欲其處內表為長廣太
守繼母遺令不附葬以是見譏數歲除太子中庶子
太子傳從後再兼散騎常侍惠帝謂司空張華曰壽
才宜真不足久兼也華表欲登九卿會受誅忠賢排

擯壽遂卒洛下位望不充其才當時寃之 兄子符
字長住亦有文才繼壽著作佐郎上兼令符弟蒞字
叔度梁州別駕驃騎將軍齊王辟掾卒洛下 蒞從
弟階字達之州主簿察孝廉褒中令永昌西部都尉
建寧興古太守階辭章燦麗馳名當世凡壽所述作
二百餘篇符蒞階各數十篇二州先達及華夏文士
多為作傳大較如此時梓潼李驤叔龍亦隸逸器知
名當世舉秀才尚書郎拜建平太守以疾辭不就意
在州里除廣漢太守初與壽齊望又相暱友後與壽
情好攜隙還相誣攻有識以是短之亦自別傳

李宓字令伯犍為武陽人也祖父光朱提太守父早
亡母何更行見養祖母治春秋左傳博覽五經多所
通涉機警辯捷辭義響起事祖母以孝聞其侍疾則
泣涕側息日夜不解帶饘飲湯藥必過目嘗口本郡
禮命不應州辟從事尚書郎大將軍主簿太子洗馬
奉使聘吳吳主問蜀馬多少對曰官用有餘民間自
足吳主與群臣汎論道義謂寧為人弟宓曰願為仁
兄吳主及群臣稱之大同後征西將軍鄧艾聞其名
請為主簿及書招欲與相見皆不往以祖母年老心
在色養拒州郡之命獨講學立旌授生武帝立太子

徵為洗馬詔書累下郡縣相逼宓上疏

疏在本傳

武帝覽

之曰宓不空有名也嘉其誠款賜奴婢二人下郡縣
供其祖母奉饘徒尚書郎河內溫令敷德陳教政化
嚴明太傅鉅平侯羊公薨無子帝令宗子為世子嗣
之不時赴喪宓遣戶曹齋移推轂遣之中山諸王每
過溫縣必責求供給吏民患之宓至中山王過縣徵
芻芟薪蒸宓引高祖過沛濱老幼桑梓之供一無煩
費伏惟明王孝思惟則動職先戒本國望風式歌且
舞誅求煩碎所未聞命後諸王過不敢煩溫縣盜賊
發河內餘縣不敢近溫追賊者不敢經界隴西王司

馬子舒深敬友之而貴家憚其公直宓去官為州大
中正性方亮不曲意勢位者失荀張指左遷漢中太
守諸王多以為寃一年去官年六十四卒著述理論
論中和仁義儒學道化之士凡十篇安東將軍胡羆
與皇甫士安深善之又與士安論夷齊及司馬文中
杜超宗郗令先文廣休等議論往返言經訓詰衆人
服其理趣釋河內趙子聲誅詩賦之屬二十餘篇壽
良李驤與陳承祚相長短宓公議其得失而切責之
常言吾獨立於世顧影為儔而不懼者心無彼此於
人也故宓六子皆英挺秀逸號曰六龍 長子賜字

宗碩州別駕舉秀才汶山太守少與東海王司馬元
超友晤每書詩往返雅有新聲少子興字隽碩太傅
參軍幼子盛碩寧浦太守 宓同時蜀郡高玩字伯
珍少受學於太常杜瓊術藝微妙博聞強識清尚簡
素少與宓齊名官位相比大同後察孝廉除曲陽令
單車之縣移檄縣綱紀不使遣迎以明三材徵為太
史令送者亦不出界朝廷稱之方論大用會卒
杜軫字超宗蜀郡成都人也父雄字伯休安漢雜令
軫少師譙周發明高經於譙氏之門郡命為功曹鄧
艾既破蜀被徵鍾會進成都時太守南陽張府君不

肯出官軫進曰征西囚執鎮西在近必有所遣軍亂
 之際交害無常宜避正殿府君即出住下舍會果遣
 參軍牽弘為太守數百騎擐甲馳馬入郡前駢問侯
 所在云已出善之按本傳弘問軫所在軫正色對曰
 前守違去就之機輒自出官舍以
 侯君子弘復召為功曹察孝廉除建寧令徙任山陽
 新城池陽所在有治入為尚書郎每升降趨翔廊閣
 之下威容可觀中朝偉之遷捷為太守惠愛在民還
 為州大中正軫既才學兼該而器量侷武帝雅識
 之方用內侍會卒時年五十八弟烈字仲武貞幹
 敏識平坦和粹名譽侔軫察孝廉歷平康牛鞞南鄭

安陽令王國建首選為郎中令遷衡陽太守兄軫喪
 自上求去官以兄子幼弱軫喪飄飄欲扶將靈柩葬
 舊墳武帝歎惜軫能用未盡而嘉烈弟意轉拜徙官
 捷為太守又轉湘東少弟良字幼論亦有當世局
 分舉秀才茶陵新都令國王郎中令遷涪陵建寧太
 守兄弟並興利里以為美譚軫二子長子毗字長
 基少子秀字彥穎珪璋琰世號二鳳毗舉秀才大
 將軍辟掾太傅參軍平東長史尚書郎稍遷鎮南軍
 司益州刺史主簿早卒
 任熙字伯遠蜀郡成都人也漢大司農任昉後也世

有德彥父元字秀明捷為太守執金吾熙治毛詩京
易博通五經事親至孝居喪毀瘠為州鄉所稱察孝
廉除南鄭令以病去官復授南鄭不就轉梓潼令為
政清淨辭疾告歸勤農力穡居室致給循訓闔門內
則可法博愛以謙恭接物開門待賓傾懷下士客無
長幼必有供饌清談遊講不妄失言祇慎著聞太康
中除越雋護軍非其雅好不往徵給事中熙以侍臣
日月左右贊暉揚光不可苟私終以疾辭而蜀郡令
每至官為之脩謁歲致羊酒即家拜朱提太守固讓
不之官好述作詩誅論難皆縻豔年六十九卒於家

子蕃字憲祖察孝廉新都令西夷司馬涪陵太守蕃
子迪字叔孤少與巴西龔壯俱知名而學業優之早
歿熙同時捷為楊彭敬宗弟遠訓宗各以德行稱同
察孝廉彭比蘇令甘露降其縣遠滇池令殊俗懷其
德

王長文字德雋按本傳廣漢郫人也父顯字伯元捷
為太守長文天姿聰警高暢敏識治五經博綜群籍
弱冠州三辟書佐丁時衰亂託疾歸家大同後郡功
曹察孝廉不就遂陽愚嘗着絳衣絳帽牽猪過市中
乞人與語偽不聞常騎牛周旋郡守至詰門脩敬至

問走出請終不還刺史淮南胡罷辟從事祭酒卧在
治罷出板舉秀才長文陽發狂疾步擔走出門罷累
遣教請還終不顧還家養母獨講學著無名子十二
篇依則論語又著通經四篇亦有卦名擬易玄以為
春秋三傳傳經不同每生訟議乃據經撫傳著春秋
三傳十二篇又撰約禮記除煩舉要凡十篇皆行於
時長文才鑒清妙汎愛廣納放蕩闊達不以細宜廉
分為意亦不好臧否人物故時人愛而敬之以母欲
祿養咸寧中領蜀郡太守郫有孝子羅偶事親至孝
二親將亡時病不能食肉終身不食肉郡察孝廉長

文追為立表以旌之宰府辟三司及撫軍大將軍王
濬累辟不詣濬薨以故州將軍吊祭元康初試守江
原令縣收得盜賊長文引見誘慰時適臘晦皆遣歸
家獄先有繫囚亦遣之謂曰教化不厚使汝等如此
長吏之過也蜡節慶賞宜就汝歸上下善相懽樂過
節來還當為思他理群吏惶遽爭請不許尋有赦令
無不感恩所宥人輟不為惡曰不敢負王君將喪去
官民思其政大將軍梁王彤及諸府並辟長文曰吾
從其先命者遂應彤招為從事中書郎諸王公卿慕
其名咸與之交賈氏之誅從彤有功封關內侯再為

中書郎愍懷太子死於許下博士中書論虞祔之禮
長文議虞祭宜還東宮以繼太子者為主配食於穎
川府君皆施行除洛陽令長文見彤曰主者不庶幾
奏長文為洛陽令彤笑答曰卿乃不庶幾非主者也
固辭不拜聞益州亂以通經筮得老蠶緣枯桑之卦
歎曰桑無葉蠶以卒也吾蜀人歿於是矣拜蜀郡太
守暴疾卒時年六十四長文時人蜀郡柳竺任興亦
博學著聞俱為州別駕竺在右職公亮蹇蹇刺史盛
怒欲殺人群下請不聽竺乃懷縛徑入頓凡上乃極
陳其刑理刺史從謝還縛關皆早亡

壽良字文淑蜀郡成都人也父祖二世犍為太守良
少與犍為張徵費緝並知名治春秋三傳貫通五經
澡身貞素州從事散騎黃門侍郎大同郡主簿上計
吏察孝廉不就州辟主簿治中別駕舉才行刺史皇
甫晏貢之三司遂辟太宰除霸城令始平太守治政
著稱從扶風轉秦國內史文立卒後温令李宓表武
帝言二州人士零頽才彥凌遲無復厠豫綱紀後進
慰寧遐外者良公朝英特二州之望宜見超子紹繼
立後帝徵為黃門侍郎兼二州都給事中梁州刺史
遷散騎常侍大長秋卒葬洛北邙山徵字建興張

翼子也篤志好學官至廣漢太守 緝字文平清檢
有治幹舉秀才歷城令涪陵太守遷譙內史

何攀字惠與蜀郡郫人漢司空沘鄉侯武弟潁川太
守顯後也父包字休揚察舉秀孝皆不行除瑯琊王
中尉不就攀兄弟五人皆知名攀少夙成竒姿卓逸
弱冠郡主簿上計吏州辟從事刺史皇甫晏稱攀王
佐才也以為主簿泰始十年養母歸家晏為牙門張
弘等所害攀操表徑詣洛訟釋事得清刺史王濬復
辟主簿別駕咸寧三年濬被詔罷屯田兵作舡為伐
吳計攀進曰今見佃兵但六百人計作舡六七年才

可勝萬人後者未成前者已腐無以輔成國意宜輒
召四守休兵及諸武吏并萬餘人造作歲終可辦濬
疑輒召萬兵欲先上須報攀曰官家雖欲伐吳疑者
尚多率聞召萬兵必不見聽以佃兵作舡舡不時成
當輒召以速為機設當見却功夫已成勢不得止濬
善之議欲入山裁舡動數百里艱難攀曰今冢墓多
種松柏當什四市取以速為機濬悅之任攀典舟舡
噐仗冬遣攀使洛攀曰聖人之功可成使人信之不
可必也夫高祖之大略猶未察於韓信婁敬因蕭何
子房而後用之今進非常之功或莫之信羊公使君

同盟國家所重加曩日失策江陵思有夙駕宜與相
聞此一助也潛曰何但羊叔子亦宋元亮為優君至
洛官家未有舉意便前至襄陽與羊宋論之攀既至
羊祜累日共畫用兵之要攀曰若令循清海以趣京
口壽春揚州直指秣陵交豫踰海並據桑浦則武昌
以東會稽以西騷然駭矣荊州平南徑造夏口巴東
諸軍固守西陵益梁之衆身浮江東下封樂鄉要巴
丘則武陵零桂長沙湘東從風而靡矣但明信賞首
尾俱會旌旗耀天四面雲合乘勝席卷傳檄南極吳
會不盡平者未之有也羊祜大悅遂表請伐吳尋徵
潛大司農至晉壽詔以潛為龍驤將軍除攀郎中參
潛軍事攀頻奉使詣洛時未婚司空裴公竒其才以
女妻之五年秋攀使在洛安東將軍王渾表孫皓欲
北上邊戍警戒朝議征伐必須六年攀上疏策皓必
不敢出宜因今戒嚴掩取甚易中書令張華命宿下
舍設諸難攀皆通之又潛性在忠烈受命必果宜重
其位號詔書遷潛平東將軍督二州事吳平封關內
侯潛入拜輔國攀為司馬上論時務五篇除滎陽令
進廷尉評有盜開城門下關者法據大辟攀駁之曰

上關執信之主下關儲備之物設有開上關何以加刑遂減死多所議讞遷散騎侍郎太傅楊駿謀逆請衆官攀與侍中傅祗侍郎王愷等往惠帝從楚王瑋殿中中郎孟觀策戒嚴誅駿駿外已匆匆攀與祗踰墻得出侍天子天子以為翊軍校尉領熊渠兵一戰斬駿社稷用安封西城公邑萬戶策曰於戲在昔先王光濟厥世罔不開國列土建德表功也故逆臣楊駿謀危社稷構兵飛矢集于殿庭白刃交於宮闈攀受命奮討凶逆速殄忠烈果毅朕甚嘉焉今以魏興之西城為攀封國錫茲玄社苴以白茅永為晉藩輔

往欽哉敬乃有土惠康黎元無或以隳爾顯烈又賞綰萬疋攀固辭受五千疋又賜拜弟逢平鄉侯兄子夔關內侯遷宣關內史不就轉東羌校尉西虜寇邊遣長史楊威討之違攀指受失利徵還領越騎校尉武庫災百官皆赴火攀獨以兵衛宮復賞綰五百疋領河南尹遷揚州刺史假節在官數年德教敷宣征虜將軍石崇表東南有兵氣不宜用遠人徵拜大司農兼三州都自表以被疾錯忘不堪銓量人物讓都職於任熙費緝不聽遷兗州刺史錫寶劔赤舄固辭不之官時帝室政衰多害忠直又諸王迭起好結黨

徒攀闔門治疾不與世務朝議欲以為公會薨時年五十七天子愍悼追贈司農印綬謚曰栢公遺令勅世子務行恭儉引荀公曾諸葛德林為模範子璋嗣李毅字允剛廣漢郪人也祖父朝字偉南州別駕從事父旦字欽宗光祿郎中主事毅少散達不治素檢年二十餘乃詣郡文學受業通詩禮訓詁為學主事太守弘農王濬臨學講試問祭酒姬艷曰學中有可成進幾百人艷對曰可有百人濬怒曰童冠八百而成者百人教少何為毅對曰如艷之言明府之教盛於孔氏不為少也濬竒之命為主簿濬常夢得三口

刀人以禾益之手持不得以問郡丞與掾史莫能知毅對曰吉祥也三刀者州字而益之禾持不得禾傍失者秩字明府秩當至益州濬笑曰如卿言當相以為秀才張弘殺益州刺史皇甫晏誣表晏反毅白濬曰皇甫侯起自諸生位極方州久當何求且廣漢與成都密邇而統梁州者矜益州之領須防在今日也益州有禍乃此郡之憂加張弘小堅衆所不與宜時赴討濬欲先上後行毅曰大夫出疆苟利社稷專之為賢何況殺主賊急當不拘常宜濬從之發兵與牙門滿泰等共討弘斬之詔書遷濬益州刺史毅復為

州主簿別駕舉秀才及濬伐吳與何攀並為參軍吳平封關內侯除隴西護軍以疾去官徙繁令遷雲南太守濬臨薨上表後武帝思濬動問毅所在徙捷為使持節南夷校尉久之捷為民毛詵李叡與朱提民李猛共逐太守杜俊雍約以叛衆數萬毅討破之斬詵猛首叡走依五茶夷亦叛晉朝復置寧州以毅為刺史加龍驤將軍封成都內侯夷遂大反破沒郡縣攻圍州城中原亂而李雄寇蜀救援不至疾病薨於窮城懷帝嘉其忠節追贈少府謚曰威侯毅性通博居情雅厚賑卹寒貧篤於故舊人咸愛歸之但好談

論德量猶少從弟苾字叔平脩身砥礪名行數諫毅且自矜嚴毅笑應之曰吾小來不治名素終杖旄節故可至九卿卿清儉履道卒不失成都令也時毅始受南夷而苾歷城令果作成都遷捷為太守位官不及毅毅子釗世秉儒學有格望以父任為謁者除壽林侯相不就為尚書外兵郎自表赴難至牂牁夷斷道不得進經年以寧州城中無穀父疾病未知吉凶不食穀惟茹草迄至奔喪官至朱提越雋太守西夷校尉毅女秀適漢嘉太守新都王載有才智父亡後州文武推領州三年二州當太清中位至方州節將

者壽良何攀及毅永嘉中巴張奕希祖為荊州刺史南蠻長水校尉蜀郡張峻紹茂為監南中八部事西夷校尉持節事

楊邠字岐之犍為武陽人也少好學志古澡厲名行州辟主簿別駕刺史王濬舉秀才安漢雒令國王中尉以選為尚書郎遷汶山太守值夷復讐失誅俗和徙授巴東轉廣漢永嘉初進衡陽內史遇流民叛亂攻沒長沙湘東邠輒救助賊衆侵盛遂破郡城獲邠欲以為主邠不許賊晝夜執守邠候其小怠夜急走比覺已去遠收餘衆軍重安欲授湘州刺史荀眺共

圖進取會眺降賊邠孤軍固城賊攻圍之誓死不移遂卒城中時年六十九帝為鎮東大將軍嘉其忠節死義遣使弔贈策曰惟永嘉七年四月己未使持節都督江陽諸軍事鎮東大將軍瑯琊王濬謹遺板命前衡陽內史楊君忠肅貞固守正不移雖危逼節義可嘉不幸殞卒孤城甚悼之今列上尚書贈君淮南內史魂而有靈嘉茲寵榮嗚呼哀哉邠同郡楊穆文曹泰始初為交阯太守平九真鬱林日南四郡斬吳交州刺史劉俊大將軍脩則武帝方授交州會孫皓遣大將軍薛珣陶璜十萬人攻稷被攻八月救援不

至衆寡不敵遂為珣璜所獲囚穰欲送皓穰歐血死
帝嘉其忠烈歿命追贈交州刺史也

費立字建熙犍為南安人也父楫字君讓巴西太守
立學義冲邃玄靜沉嘿察孝廉王國中尉王年少好
輕行遊觀立常正色匡諫及上疏風喻辭義剴切合
箴規之體出為成都令縣名難治立蒞之垂績以性
公亮入為州大中正除巴西太守不就轉梁益寧三
州都督兼尚書值大駕西幸長安常與大臣居守在
洛加負外散騎常侍封關內侯每准正三州人物品
格褒貶帥意方規無復䟽親莫不畏敬然委曲者多

恨其繩墨數辭諸郡意在河秦汝穎久之朝議欲以
為荊州永嘉六年與子并沒于朝寇立時漢國呂毅
叔偉德以清彥辟別舉秀才尚書郎秦國內史長水
校尉負外常侍梁州都督與立同沒胡寇

常騫字季慎蜀郡江原人也祖父竺字代文南廣太
守侍中父偉字公然閬中令騫治毛詩三禮以清尚
知名州辟都從事主簿郡請功曹察孝廉萍鄉令以
選為國王侍郎出為綿竹令國王歸之復入為郎中
令從王起義兵有功封關內侯遷魏郡太守加材官
將軍以晉政衰覩中原不靜固辭去官拜新都內史

時蜀亂民皆流在荆湘徙湘東太守疾病未拜卒年六十八騫性泛愛敦敬友宗族當官脩理恕以撫物好咨問動必謙讓州鄉以為儀範二州清官見述者先有宜都太守犍為唐定義葉隴西太守巴西馮公休翊而後騫云

常寬字泰恭騫族弟郫令勗弟子也父廓字敬業以明經著稱早亡闔門廣學治毛詩三禮春秋尚書尤耽意大易博涉史漢疆識多聞而謙虛清素與俗殊務郡命功曹及察孝廉不就州辟主簿別駕舉刺史羅尚秀才為侍御史除繁令隨民安縣零陵以舉將

喪去官湘州叛亂乃南入交州交州刺史陶咸表為長史固辭不之職雖流離交城衣弊褊袍冠皮冠乘牛往來獨鳩合經籍研精著述依孟揚宗盧師矩著典言五篇撰蜀後志及後賢傳續陳壽耆舊作梁益篇元帝踐祚嘉其德行潔白拜武平太守民悅其政以榮貴非志在官三年去職尋梁碩作亂得免難卒於交州凡所著述詩賦論議二十餘篇子長生字彭祖亦有學行州主簿資中令治中從事早亡時蜀郡太守巴西黃容亦好述作著家訓梁州巴紀姓族左傳抄凡數十篇漢嘉太守蜀郡杜襲敬脩亦著蜀後

志及志趙厥李特叛亂之事及喪紀禮式後生有取
焉

譙登字慎明巴西西充國人譙周孫也仲父熙察孝
廉本郡大中正沔陽令叔父同字彥紹少知名拒州
郡之命梁州刺史壽良與東羌校尉何攀貢之三司
及大將軍幕府為尚書郎除錫令亦有為作傳者登
少以公亮義烈聞郡命功曹州辟主簿別駕從事領
陰平太守郡五官素大姓豪擅侵凌羌晉登誅之郡
中皆肅後以李特作亂本郡沒寇父為李雄巴西太
守馬晚所殺乃東詣鎮南劉公請兵時中原亂守公

三年不能得兵表拜楊烈將軍梓潼內史使合義募
登凡募巴蜀流士得二千人鎮西將軍羅尚以退住
巴郡登從尚索益軍討雄不得乃往攻宕渠斬晚食
其肝巴西賊破復詣尚求軍尚叅佐多以必無利登
憤恚數凌折之又加責於尚尚但下之而已會羅美
殺雄太尉李離舉梓潼來降登徑進涪城雄自攻登
為登所破而尚將張羅進屯犍為之合水文碩殺雄
太宰李國以巴西降羅遣軍掠廣漢破雄叔父驤虜
其妻子募人斫雄頭賊以向困而尚本叅佐恨登之
見矜侮不供其軍食益州刺史皮素至巴東勅平西

送故遣將張順楊顯救登至墊江素遇害顯還雄知
登乏食遣驥致攻兵窮士餓誓死不退衆亦餓死而
無去者永嘉三年為驥所生得與登致雄言辭慷慨
涕泣歔歔無服降臣折情雄乃殺之囚其軍士皆以
為奴虜畀兵士而連陰雨百餘日雄中以登為枉而
所領無辜怒氣感天下赦出登軍士湮沒者初尚之
在成都也與雄攻戰郫令犍為張昕欽明每摧破雄
雄衆戰之而救助不能并心為雄所殺雄常言羅尚
將均如張昕輩吾族早無遺矣時牙門左汜亦有戰
功尚不能益其兵穀汜恚恨以母喪歸尚累召不往

尚怒曰微左汜當不滅賊乎遂殺之雄聞汜死大小
相賀登同郡縣李高亦有武幹平吳時與牙門將處
前獲孫皓封縣侯官至金城鴈門太守

侯馥字世明江陽人也察孝廉平西參軍闕薨後巴
郡亂避地入牂牁寧州刺史王遜鎮平西將軍復取
為參軍遜議欲遷牂牁太守謝恕為涪陵太守出屯
巴郡之把口表馥為江陽太守往江陽之泚源撫卹
蠻獠克復江陵請通長江雄征東大將軍李恭已在
江陽馥招降夷獠脩繕舟艦為進取計預白遜請軍
移恕俱出涪陵不能自前恭舉衆攻馥衆寡不敵為

恭所破獲生虜馘送雄雄下廷尉責曰事君有死無
二其次破家與國今縱不死又無益國及沒其分守
心而已無他顧望雄必欲屈之使馘同郡人張迎曉
喻之馘怒罵迎曰吾等國亡不能存大難不能死伍
眉海內何面目相見也且王寧州治亂才也以吾有
桑梓之耻故遠上尚書遣吾討賊受命之日實忘寢
食但裁舡未辦請軍未至牽搦不及為他所先當滅
身隕碎以謝不及冀上不負日月下不愧王侯吾豈
苟生如鄉兒女之人乎迎還白雄雄義而赦之時雄
衆寇所獲捷為太守建寧魏紀漢國太守梓潼文琰

巴郡太守巴西黃龕涪陵太守巴西趙弼永昌謝俊
牂牁文猛皆區區稽顙無如馘者數年卒

譔曰文王多士才不同用孔門七十科擗行百行殊塗

貴於一致若斯諸子或挺珪璋之質或苞瑚璉之器

或耽儒墨之業或韜王佐之略潛則泥蟠躍則龍飛

揮翻揚芳流光遐紀實西土之珍彥聖晉之多士也

徒以生處限外服膺日淺負荷榮顯未克其能假使

植幹華宇振條神區德行自有長短然三趙兩李張

何之軌其有及之者乎譙登侯馘忠規奮烈美志不

遂哀哉

五公

司空何武

司空趙戒

太尉趙謙

司徒趙溫

司空張皓

華陽國志卷第十一

